

**Uunga siunnersuut, Inatsisartut aalajangiiffigisassaattut siunnersuut, Namminersorlutik Oqartussat ilalissagaat NemID-mik pisortat digitaliusumik signatur-iannik imaqartumik inunnut aamma inatsisit naapertorlugit immikkoortortani sulisunut Kalaallit Nunaanni atortuulersinneqassasoq Kunnigip peqqussutaagut** (Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

## **Saqqummiussinermi oqaaseqaatit**

### **Siullermeerinnineq**

Folкетин- ip akuersissutigisimavaa Inatsit nr. 439, 8. maj 2018-imi, Nem ID-mik pisortat ilisarnaataannik ilisarnaatitalimmik sanatitsisarneq pillugu, inunnut aammalu inatsisit naapertorlugit ingerlatsiviit sulisuinut. Inatsit atortuulerpoq 1. juli. Inatsit Kalaallit Nunaanni atuutinngilaq, kisiannili Kunnigip peqqussutaatigut tamakkiisumik imaluunniit ilaannakuusumik Kalaallit Nunaanni atortuulersinneqarsinnaalluni, allannguuteqarluni kalaallini pisariaqartitsinernut naapertuuttunik.

Periarfissaasimavoq innuttaasunut Kalaallit Nunaanni inuit allattorsimaffianni nalunaarsorneqarsimasunut NemID -mut pisortat digitaliusumik signatur-iannik imaqartumik allagartartaarnissaq 2009-miilli. Digitalimik Sullissinermit Aqutsisoqarfiup siulia IT-mut allattoqarfik, Kalaallit Nunaata sinniisoqarfia København-imi suleqatigalugu Nets DanID A/S-imut isumaqatigiissuteqarpoq kommunit taakkuusinnaasut immikkoortortat nalunaarsuiffiusartut inuit NemID-mik sanatitsisarneranni, danskit kommuniisulli.

Digitalinngortitsiniarnermi periusissiaq siusinnerusoq nukittuumik isiginiaasimavoq digitaliusumik imminut sullinnissamut aaqquissuusinernik pisortani ingerlatsinermi, allanillu digitaliusunik attaveqaqatigiinnermi aaqquissutaasartunik innuttaasuut aamma suliffeqarfinnut. Pisortat ingerlatsineranni allakkat digitaliusut maanna pilersinneqalerpoq, Pisortani Digitalimik Allakkerineq pillugu Inatsisartut inatsisaat nr. 14, 8. juni 2017-imeersoq naapertorlugu. Digitaliusumik ingerlatsinermi periusissiassaq aggersoq suli annertunerusumik digitaliseriinnissamik aallussisuusaaq.

Aammattaaq Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat nr. 33, 28. november 2016-imeersoq 1. januar 2018 atortuulerpoq. Tamatumuuna periarfissaalersinneqarpoq inatsisitigut immikkoortortat tamarnik, tassalu pisortatut oqartussaasut aamma suliffeqarfiit NemID-mik sulisuminnut inatsisilerinermi ingerlatsinermi sulisuusunut sanatitsisinnaanerat. Taamaasillunilu maanna periarfissaalerpoq imminut digitaliusumik sullinnissamut attaveqaqatigiinnermullu aaqquissutitnik pilersitsisinnaaneq, kalaallit suliffeqarfiinut isumannaatsumik naammassiuminartumillu. NemID pillugu inatsisikkut aalajangiunneqarpoq pisortat suliassarigaat digitaliusumik ilisarnaammik pilersitsisarneq, inatsisiliornikkullu killiliussassanik ersarissunik

pilersitsisoqarpoq pisussaaffiit piginnaatitaaffillu pillugit, allaffissornikkut NemID-mik pilersitsisarnermut atatillugu. Taamaalilluni innuttaasut aamma suliffeqarfiit inatsisitigut illersugaanerat nukittorsaavigineqarpoq. Suliassaqarfimmi tassani inatsisitigut illersuinerup immikkut qularnaassavaa innuttaasut aamma suliffeqarfiit ersarissunik naammagittaalliornissaminnut periarfissaqarnissaat, NemID-mik sanaaneqarsinnaanngikkunik, NemID-ertik matuneqarsimappat imaluunniit assingusunik pisoqarsimatillugu.

Naalakkersuisut pingartippaat aamma nunatsinni ersarissunik inatsisitigut killiliussanik peqarnissaa, innuttaasut aamma inatsisit naapertorlugit ingerlatsivinni sulisuusut NemID-mik sanaaneqartarneranut atatillugu.

Taamatut oqaaseqarlunga aalajangiiffigisassatut siunnersuut Inatsisartunut suliassanngortippara.